

# MEJE PO CARTE PABLO TATINA, GALACIA NACUAPIWI TATINATSI

---

**Meje yabara poxonae Pablo tamropata pitaba xua tatina  
pomonaetha pomonae Galacia nacuapiwi**

**1** <sup>1</sup>Xan, Pablon, Jesucristo pia peitorobi jiwi jiwana tatsin. Apra ichun jopa neitapetsiyo yawa pebiwi jopa neitorobiyo. Apra jame Jesucristo bapon neitoroba, yawa Nacom, Waxa, neitoroba, pon Pexanto asu exana petupae coyene weya. <sup>2</sup>Xan, iruru ichamonae pomona pejume cowuntsiwi daxita barapomona pan paca jacobatsi. Barapo carte pacata tinatsi pomona Nacom piamona tatsi pam, painya nejume cowuntsixae Jesucristo pomona Galacia nacuatha painya nejinompaewa. <sup>3</sup>Barabu Nacom, pon Waxa, iru Jesucristo, pon jiwi Pecanamataxeinaein, baponbe amanaya paca yawenaena pia paca necaantobexae. Yawano barabu Nacom juntea jinompa paca exanaena. <sup>4</sup>Bapon Jesucristo naca tsitupa xua wanaca capanenebiya exanaenexa barapo abe waexanae coyene weya xua po abe exanae coyene exana pomona jinompa po cae pin nacuathe. Nacom pon Waxa ichichipa naca capanepa daxita barapo coyenein weya. <sup>5</sup>Barabu Nacom wuna jaintatsi jiwi xua ataya tsane!

**Meje yabara xua ajibi icha pecapanenebiyae coyenewa**

<sup>6</sup>Najuntu coyene benaegan xua nainya papentame Nacom, pon paca waba. Tsipei apra bapon paca yawena po peantobe coyenewatha Cristo iruru xeina waxainchi nexa. Yawa najuntu coyene benaegan xua pajume cowuntame icha jume diwesi xua be pecapanenebiyae diwesi jume xua saya jiwi paeba. <sup>7</sup>Bara xaniwaicha, xua icha pecapanenebiyae diwesi aibi. Pocotsiwa xua ichamonae paca cana exana baxua paca juntu coyene tsacaba xua painya nejume cowuntsinexa icha diwesi, xua toxeinchiya painya nejume cowuntsinexa Cristo pia pecapanenebiyae diwesi jume tatsi. <sup>8</sup>Icha ichun toxeinchiya ichawiya yabara paca tsipaeba xua pocotsiwa bayatha paca tsipaebatsi pecapanenebiyae diwesi coyene

barabũ Nacom bapontha cabeta exanaena abe peexanaexae. Metha bara bequein xan tsipaein, ichitha Nacom necabetsipa. Ichacuitha metha bara bequein matatsunpin tsipae pon itaboco wetsica pona, ichitha Nacom cabetsipa bapontha. <sup>9</sup>Baxua bayatha paca tsipaebatsi ichitha equeicha baxua paca tsipaebatsi. Paca jeichi: Icha ichũn toxeinchiya ichawiya yabara paca tsipaeba xua pocotsiwa bayatha paca tsipaebatsi pecapanenebiyae diwesi coyene barabũ Nacom bapontha cabeta exanaena abe peexanaexae, paca jeichi.

<sup>10</sup>Poxonae paeban baxua jopa cueicueijanyo pocotsiwa jiwi beta tana neyabara nanta xeinaewa. Apará jame cueicueijan Nacom wũnae tana neyabara nanta xeinaexae. Icha saya nanta xeineibichipan xua exanan po coyeneyatha xua jiwi beta tana neyabara nanta xeinebiwa tsane bapoxonae xan jopa Cristo pia peitorobi jiwi jiwana tatsin tsipae.

**Meje yabara xua poxonae Pablo Jesucristo pia peitorobi jiwi jiwana tatsi cana exainchi**

<sup>11</sup>Tamonae pam, pomonae irũ painya nejume cowũntsiwixae Jesucristo. Ichichipan xua painya neyaputaewa xua po diwesi pecapanenebiyae diwesi xua po diwesi cueicueijan, barapo diwesi apara jopa jiwi pia diwesiyo tatsi. <sup>12</sup>Matauta barapo diwesi apara xua jopa jiton netsipaebiyo. Yawa matautano dapon aibi xua pon necuiduba barapo diwesi. Apará saya Jesucristo neyaputane exana poxonae netsita itũta pia coutha.

<sup>13</sup>Paxam pajume taneme xua pocotsiwa bayatha exanan, xua poxonae cataunxuae eexanaponan xua po coyene judiomonae exana pia pejume cowũntsiwa xua abe yabara, yawa pejinompae coyene yabara. Bayatha payaputaneme xua bichocono abe cana exanan pomonaetha pomonae Nacom piamonae tatsi daxita pomonae pejume cowũntsiwixae Cristo. Ichichipan xua daxita weraweraca taexanaewa.

<sup>14</sup>Xan bichocono yabara nacuidubaponan po coyene judiomonae pia pejume cowũntsiwa tatsi. Yawa yabara nacuidubaponan po coyene pia pejinompae coyene tatsi. Bichocono nacuidubaponan beyacaincha xua ichamonae nacuidubapona pomonae tanacuapiwi pomonae tana newei jũpaewi. Bichocono ichichipan xua taexanaewa po coyene tamo susato jiwi exana, beyacaincha xua ichamonae exana. <sup>15</sup>Ichitha caena bayatha Nacom neitapeta xua tajume cowũntsiwa tsane bapon pewũnaeya poxonae beya tanaexanaewa tsane. Daxota Nacom newaba, bichocono petana neantobexae. <sup>16</sup>Bapon Nacom yabara neyaputane exana Pexanto tatsi, pon Jesucristo. Baxua Nacom inta exana Pexanto tatsi tayabara cueicueijeinexa tsane pomonaetha pomonae jopa judiomonae naexanaeyo. Poxonae barapo coyeneya necana exana jopa baxua yabara paebinyo ichamonae. <sup>17</sup>Matautano jopa ponaeinyo Jerusalén tomara beya xua baxua tayabara paebinexa Jesucristo pia peitorobi jiwitha tatsi

pomonae bayatha netsiwana cana exainchi Jesucristo pia peitorobi jiwi tatsi. Seicaya nama xan nainya ponan Arabia nacua beya. Bapoxonae pirapaeyo Damasco tomara beya ponan.

<sup>18</sup>Jopa nainya ponaeinyo Jerusalén tomara beya. Saya bara beya ponan poxonae acoibi po weiyobe yapucaewa. Bapoxonae Pedro tan, yawa baxota naecan quince po matacabibe. <sup>19</sup>Jopa taeinyo daxita pomonae Jesucristo pia peitorobi jiwi tatsi. Saya meisa Santiago tan pon Jesús pia peitorobi jiwi jiwana pin tatsi, pon jiwi Pecanamataxeinaein bapon peweicho tatsi. <sup>20</sup>Bara xaniwaicha tinan. Nacom yaputane xua jopa naerabinyo pocotsiwa pacata tinatsi.

<sup>21</sup>Nexata bapoxonae Siria nacua beya ponan, yawano Cilicia nacua beya ponan. <sup>22</sup>Nama pomonae jinompa Judea nacua tha, pomonae Cristo pejume cowantsiwi, cataunxuae barapomonae jopa xaniwaicha neyaitaeyo. <sup>23</sup>Saya barapomonae jume tane xua ichamonae neyabara jeye: “Apara bapon, pon caena bayatha abe naca cana exana wajume cowuntsixae Cristo. Anoxuae bapon yabara cueicueijeji tsurucuaenaebiya Jesucristo pia pejume cowantsi diwesi, bequein copiya ichichipa weraweraca cana exana ichamonae pomonae pejume cowantsiwi Jesucristo”, neyabara jei. <sup>24</sup>Barapomonae wuna jainteiba Nacom poxoru anoxuae wuna exanan Nacom nexa.

**Meje yabara poxonae Jesús pia peitorobi jiwi tatsi  
Pablo caemonae nabarú naexanatsi**

**2** <sup>1</sup>Jerusalén tomara weya ponan xua jiwi tatsipaebinexa Nacom Pejume Diwesi icha nacuantha. Poxonae catorce po weibe yapucaewa bapoxonae Bernabé equeicha paponanbe Jerusalén tomara beya. Yawa irú Tito barú ponan. <sup>2</sup>Bara beya ponan tsipei Nacom netsita ituta xua bewa ponaein. Baraxota Jerusalén tomaratha pomonae pecanamataxeinaewi Nacom piamonae tatsi daxita pomonae pejume cowuntsixaetsi Cristo barapomonae compa nebarú nacaetuta. Barapomonaetha yabara tsipaeban po diwesi pecapanenebiyae diwesi jume, xua po diwesi tsipaeban pomonaetha pomonae jopa judiomonae naexanaeyo. Baraxua exanan tsipei jopa ichipaeinyo xua barapo diwesi pejumexaei tsane po diwesi bayatha tsipaeba ducuaaeteiban yawa xua anoxuae tsipaeban pomonaetha jopa judiomonae naexanaeyo. <sup>3</sup>Tito baxota nabarú ecan. Bequein bara bapon griego nacua monaepin ichitha jopa itorobichi xua pewi thabiwatsi xua ichaxota pebiwi nareixacaena. Bequein ichamonae baxua ichichipa xua baxua Tito pecana exanaewatsi, ichitha jopa baxua cana exanaetsi. <sup>4</sup>Ichamonae pomonae Cristo Jesús jopa xapain jume cowuntsichi, barapomonae namicha pata poxonae pana nacaetutan. Barapomonae ichichipa xua Tito pewi thabiwatsi xua ichaxota pebiwi nareixacaena. Barapomonae namicha pata poxoru

ichichipa yaputane xua icha paxan jopa paexanaeinyo pocotsiwa Moisés pia peitorobi coyenewatha itoroba xua anoxuae pata jume cowuntsixae Cristo Jesús. Barapomonaе ichichipa xua equeicha bewa paexanaein pocotsiwa Moisés pia peitorobi coyenewatha yabara itoroba xua penawi thabi coyene. <sup>5</sup>Matautano bara caetono barapomonaе jopa pajume cowuntsiya taeinyo. Yawano jopa paexanaeinyo pocotsiwa xua barapomonaе pana neitoroba xua jame saya poxoru apara painya neyaputaewa tsane pexainyeiwa xua po coyene Nacom pia pecapanenebiyae diwesi jume xeina.

<sup>6</sup>Jerusalén tomaratha tsipaeban pomonaе pecanamataxeinaewi Nacom piamonaе tatsi daxita pomonaе pejume cowuntsixaetsi Cristo. Nayabara paeban barapomonaetha pomonaе Nacom piamonaе tatsi pecanamataxeinaewichi po coyene Nacom Pejume Diwesi tsipaeban pomonaetha pomonaе jopa judiomonaе naexanaeyo. Ichitha barapo matabitha barapomonaе pomonaе Nacom piamonaе tatsi pecanamataxeinaewichi jopa neitorobiyo xua tamuxuna cueicueijejewa xua icha diwesi xua Jesucristo yabara poxonaе cueicuejei ducuaenebiyan po diwesi xua yabara paeban pomonaetha pomonaе jopa judiomonaе naexanaeyo. Jopa inta ainya cuiyo xua barapomonaе bichocono peainya cui jiwi xua pecanamataxeinaewi xua nama xan jopa daichinyo, tsipei Nacom daxita tsitatsi xua xan iru barapomonaе penajurpe jiwi pan. <sup>7</sup>Barapomonaе jopa necatsiyo pena pecuidubiwa xua tacueicueijeinexa. Barapomonaе yaputane xua Nacom neitoroba tacueicueijeinexa pia pecapanenebiyae diwesi pomonaetha pomonaе jopa judiomonaе naexanaeyo pomonaе jopa pewi thabiwichi. Icha Nacom ichi xua Pedro itorobatsi xua pecueicueijejewa tsane barapo pecapanenebiyae diwesi judiomonaetha, barichi Nacom neitoroba xua tacueicueijejewa tsane barapo diwesi pomonaetha pomonaе jopa judiomonaе naexanaeyo. <sup>8</sup>Nacom Pedro exainchi Jesucristo pia peitorobi jiwi jiwana pin tatsi xua pomonaе judiomonaе nexa. Barichi Nacom neexana xua Jesucristo pia peitorobi jiwi jiwana pin tatsin xua pomonaе jopa judiomonaе naexanaeyo nexa.

<sup>9</sup>Santiago, iru Pedro iru Juan barapo acoibi poyobe jiwi yabara nanta xeina xua barapo acoibi poyobe pepa pecanamataxeinaewi xua canamataxeinatsi pomonaе Nacom piamonaе tatsi daxita pomonaе pejume cowuntsixaetsi Cristo. Barapo acoibi poyobe yaputane xua Nacom necata barapo penacuichiwa. Bapoxonaе barapo acoibi poyobe necobe jayaba xua patsita itapeinya xeinan xua peburuya cuita pata nanta xeinaewa xua xan barapoyobe jiwana pin poyobe xua Nacom Pejume Diwesi cueicuejei jiwitha. Barapo acoibi poyobe iru Bernabé cobe jayabatsi. Barapomonaе baxua exana poxoru pata jiwimonaе pana naexanan, yawano poxoru barapomonaе peburuya nanta xeina, xua

paxanbe Bernabé panbe paponaeinbe ichaxota pomonae jopa judiomonae naexanaeyo xua irurũ poxonae barapomonae nabarũ nacuichina pomonae judiomonaetha. <sup>10</sup>Barapo acobi poyobe pana itoroba, pana nejei: “Pananta xeinare xua painya neyawenaewa tsane peacopeibi jiwi Jerusalén tomaratha”, pana jei. Baxua bichocono ichichipan xua taexanaewa tsane.

**Meje yabara poxonae Pablo muxutainyaba,  
Pedro muxutainyabatsi Antioquía tomaratha**

<sup>11</sup>Nexata poxonae Pedro Antioquía tomaratha patopa, bapon itabara taeya muxutainyaban tsipei bapon bayatha abe exana. <sup>12</sup>Pocotsiwa bapon exana baxue: Copiya bapon Pedro naxane pomonaetha pomonae jopa judiomonae naexanaeyo, pomonae xua jopa ba wi thabichi xua ichaxota pebiwi pia penareixacaenaewa bequein bapon judiomonaepin. Ichitha poxonae pata pebiwi, po pebiwi Santiago barũ popona, bapoxonae Pedro tsana xane jopa equeicha naxaeyo pomonaetha pomonae jopa judiomonae naexanaeyo. Baxua Pedro exana poxoru Santiagobarũ cunuwatsi xua poxoru Santiagobarũ paeba xua pinae bewa daxita pebiwi wi thabichi, metha bequein tsipae pomonae pepa judiomonae, matautano metha bequein tsipae pomonae jopa judiomonae naexanaeyo. <sup>13</sup>Bapoxonae ichamonae icha judiomonae pomonae pejume cowũntsiwi Jesucristo, barichi jũpa exana icha Pedro ichi xua tsana xane. Bequein barapo ichamonae yaputane xua jopa bewa itorobi xua pewi thabiwatsi pomonae pejume cowũntsiwi, ichitha awiya barapomonae paeba xua bewa pinae wi thabichi pomonae pejume cowũntsiwi. Barichi Bernabé bara jutiya ichi irũ exana xua tsana wepu xane pomonae jopa judiomonae naexanaeyo. <sup>14</sup>Ichitha poxonae tan xua barapomonae jopa xapain exanaeyo pocotsiwa xua Nacom pia pecapanenebiyae jume diwesitha paeba bapoxonae Pedro tsipaeban peitabaratha tatsi daxita pomonae Nacom piamonae tatsi pejume cowũntsiwaetsi Cristo pomonae nacaetuta. Janje: “Xam bequein judiomonaepim ichitha poponame icha ichi poxonae popona pon jopa judiomonae naexanaeyo. Jopa exanaem icha ichi poxonae exana pon judiomonaepin. Xam jopa bewa itorobim pomonae jopa judiomonae naexanaeyo xua bewa exanaena icha judiomonae ichi xua poxonae exana”, jan.

**Meje yabara xua judiomonae xuano pomonae jopa judiomonae naexanaeyo  
xua irũ capanenebiya tsainchi xua Jesucristo pejume cowũntsiwixaeysi**

<sup>15</sup>Waxainchi judiomonae naexanatsi. Ichitha waxainchi jopa abe waexanae jiwichi xua jopa icha ichamonae ichiyo pomonae jopa judiomonae naexanaeyo, tsipei barapomonae abe peexanaewi.

<sup>16</sup>Waxainchi yaputainchi xua bequein exanatsi pocotsiwa Moisés pia

peitorobi coyenewatha itoroba, ichitha jopa jüntu coyene xeicaetsi Nacomtha xua jopa Nacom watsita natsicuentisiwa tsane abe waexanaexae bapontha. Jiwi ba jüntu coyene xeica poxonae Jesucristo jume cowuntatsi. Waxainchi jüntu coyene xeicatsi poxoru jume cowuntatsi Jesucristo xua poxoru jopa wajume cowuntsiya exanaexae pocotsiwa Moisés pia peitorobi coyenewatha itoroba. Dapon aibi pon pejüntu coyene xeicaein xua pejume cowuntsiya exanaexae pocotsiwa Moisés pia peitorobi coyenewatha itoroba.

<sup>17</sup>Waxainchi ichichipatsi xua wajüntu coyene xeicae jiwichi wanaca yawenaexae Cristo. Ichitha icha waxainchi nacuidubaponatsi xua xeinatsi peajüntucoyenebewa xua bequein Cristo naca yawena, bapoxonae jopa naca yawenaeyo Cristo. Matautano bapoxonae bapon abe naca cana exana. ¡Jume, baxua apara Cristo jopa bapana nacata exanae! <sup>18</sup>Nacom tsitan xua tatsita natsicuentisiwa abe taexanaexae bapontha icha equeicha jiwi caewa itoroban xua bewa exanaena pocotsiwa Moisés naca itoroba pia peitorobi coyenewatha wanaca capanenebiyaenexa abe waexanae coyenewa weya. <sup>19</sup>Barapo Moisés pia peitorobi coyene jopa neyawenaeyo xua necana exana xua tajüntu coyene xanepanaewa Nacomtha. Saya necana exana xua tatupaewa tsane, poxoru awiya tanatsicuentisiwa xeinan. Ichitha anoxuae Cristo tana netsitupaexae neitacupa xua tapoponaewa Nacom nexa. Matauta anoxuae jopa neitorobiyo Moisés pia peitorobi coyenewa tatsi poxoru jopa xeinaeyo peayapusu itorobi coyenewa xua tana necapanepaewa tsane abe taexanae coyenewa weya. <sup>20</sup>Poxonae Cristo tupa naetotha inta yawa muxuna tupa abe taexanae coyenewan. Daxota anoxuae xan be ichun, tsipei Cristo neyawa popona. Po peajüntuyapusuwatha poponan, barapo peajüntuyapusuwa Nacom necata tajume cowuntsixae Cristo. Bapon Cristo, pon Nacom Pexanto, bichocono neantobe, daxota inta tsitupa abe taexanae coyenewan. <sup>21</sup>Jopa benaitematsinyo Nacom pia peantobewa tatsi. Icha nanta xeinan xua jiwi najüntu coyene xeica exana Nacomtha peexanaexae pocotsiwa Moisés pia peitorobi coyenewa itoroba, xua daxota bapoxonae Cristo jopa nantawenonaeyo xua jiwi petsitupaewatsi bara be poxonae xuban Nacom pia peantobewa tatsi.

### Meje yabara xua Moisés pia peitorobi coyenewa tatsi

**3** <sup>1</sup>¡Eta bichi tsobenae Galacia nacuapiwi! ¿Jintam pon mara pexeinaein paca baru xuajei xua jopa painya nejume cowuntsiwa Nacom pia pejume xainyeiwa tatsi? Poxonae paca tsipaebatsi paca yaputane exainchi xua Jesucristo tsitupa jiwi naetotha xua jiwi tsitupatsi. <sup>2</sup>Baraxua pana nejume nore: ¿Nacom paca cata pia Pejumope tñaxu tatsi painya neexanaexae pocotsiwa Moisés pia peitorobi coyenewatha itoroba? Jume. Nacom paca cata pia Pejumope tñaxu tatsi painya

nejume cowuntsixae po coyene xua yabara paca tsipaebatsi xua pejume cowuntsiwa Jesucristotha. <sup>3</sup>iMaisa bichoconocai! ¿Eta pomonae pam tsobenaem? Poxonae copiya pajume cowuntame Nacom pia Pejumope tñaxu tatsi paca yawena xua Nacom painya netsita xeinaewa pejñntu coyene xeicaewa. ¿Anoxuae pananta xeiname xua bichocono pejñntu coyene xeicaewa paxeiname beyacaincha xua copiyatha paxeiname, xua Moisés pia peitorobi coyenewa painya exanaexae? Ajibi, jopa bewa baxua pananta xeinaem. <sup>4</sup>Ichamonae bichocono paca atene exana Jesucristo pexeinya jume diwesi painya nejume cowuntsixae. Jopa bewa pana nacui barapentsim xua painya nejume cowuntsiwa Jesucristo pejume diwesi, po diwesi yabara xua ichamonae atene paca exaneiba. Tsipei icha pana nacui barapentsipame xua painya nejume cowuntsiwa Jesucristo pejume diwesi jopa pexainyei jume tsipae pocotsiwa xua papaebame. <sup>5</sup>Nacom paca cata pia Pejumope tñaxu tatsi. Matautano Nacom pexeinya petsita itubi coyenewa exana painya xantha. ¿Eta pocotsiwa metha Nacom baxua exana? Baxua Nacom jopa pacata exanaeyo xua poxoru painya neexanaexae pocotsiwa Moisés pia peitorobi coyenewatha itoroba. Apara jame baxua pacata exana poxoru painya nejume cowuntsixae po diwesi xua pajume taneme.

<sup>6</sup>Abraham pon caena bayatha popona yabara jume cowñnta xua Nacom exanaena pocotsiwa Abraham yabara tsiwñnae muxu dutatsi. Daxota Nacom tsitatsi xua bapon Abraham bara pejñntu coyene xanepanaein xua jopa Nacom tsita xeinaetsi penatsicuentisiwa xua abe peexanaexae. <sup>7</sup>Daxota paxam bewa payaputaename xua pomonae xaniwaicha Jesucristo pejume cowuntsiwichi, Nacom tsitatsi xua barapomonae bara be yatsicaewa Abraham pia pemomoxi susato jiwi tatsi bequein bara jopa yatsicaewa Abraham pia pemomoxi susato jiwiyoy tatsi. <sup>8</sup>Caena bayatha Nacom Pejume Diwesi paeba, xua Nacom capanenebiya tsane pomonae jopa judiomonae naexanaeyo xua jopa peatenenexa tsane xua abe peexanaexae. Baxua Nacom exana, icha ichichi pomonae judiomonae xua capanenebiya tsainchi. Daxita pewñnaeya baxua Nacom paeba pia pexeinya jume diwesitha xua Abrahamtha jeye Nacom: “Daxita nacuanpiwi jñntu coyene weiweina exanaein tana nejume cowuntsixaemxae”, jei Nacom. <sup>9</sup>Daxota daxita pomonae jume cowñnta, jñntu coyene weiweina, xua Abraham muxuna, xua iru Abraham pejume cowuntsixae.

<sup>10</sup>Pomonae bequein jume cowuntsiya eexanapona pocotsiwa Moisés pia peitorobi coyenewatha itoroba xua pecapanenebiyaewa tsainchi, barapomonae bexa atene tsane xua Nacom exanaena abe peexanaexae. Tsipei Nacom Pejume Diwesitha jeye: “Pomonae jopa exanaeyo daxita po coyene itoroba Moisés pia peitorobi coyenewatha, daxita barapomonae atene tsane xua Nacom exanaena abe peexanaexae”, jei. <sup>11</sup>Yaputainchi

beta, dapon ajibi pon pexeinaein xua po coyene pejúntu coyene xanepanaewa, xua daxota Nacom tsitatsi xua jopa penatsicuentisiwa abe peexanaexae. Tsipei bequein ichichipa xua peexanaewa xua po coyene Moisés pia peitorobi coyenewatha itoroba, daichitha jopa itacupaetsi xua exana daxita xua Moisés itoroba. Ichitha Nacom Pejume Diwesitha jeye: “Pon xua Nacom júntu coyene xanepana exana pon pejume cowúntsixaetsi, barapon bara ataya asu poponaena”, jei. <sup>12</sup>Jiton jopa nantawenonaeyo xua Jesucristo jume cowúntatsi peexanaewa tsane daxita pocotsiwa Moisés pia peitorobi coyenewatha itoroba. Barapo peitorobi coyenetha jeye: “Bewa exanaename daxita pocotsiwa xua barapo peitorobi coyenewatha paeba ayapusúya nepoponaewa tsane”, jei.

<sup>13</sup>Cristo naca capanepa poxonae naetotha naca tsitupa wanaca yantomatsixae xua abe peexanae coyene waexanaexae po peabe exanae coyene Moisés pia peitorobi coyenewatha yabara paeba. Cristo baxua exanatsi xua tupa be pon xua bichocono abe peexanaein xua abe waexanae cuiru coyene peyawa tupaexae. Baxua yabara Nacom Pejume Diwesitha jeye: “Pon petupaein naetotha ducua bapon Nacom tsita abetsi xua bapon abe peexanaexae”, jei. <sup>14</sup>Cristo Jesús naetotha petupaexae daxota Nacom catsina pomonaetha pomonae jopa judiomonae naexanaeyo po coyene xua bayatha Nacom Abraham tsiwúnae yabara muxu dutatsi. Nacom Abraham tsiwúnae yabara muxu dutatsi xua pecatsinexatsi peantuyapusúwa. Matautano Nacom Abraham tsiwúnae yabara muxu dutatsi xua Nacom pia Pejumope tñaxu tatsi naca yawa jinompaena poxonae jume cowúntatsi Jesucristo.

### **Meje yabara xua Nacom pia petsiwúnae yabara muxu dutsiwa tatsi**

<sup>15</sup>Tamonae pam, pomonae iru painya nejume cowúntsiwixae Jesucristo. Paca tsipaebatsi tsica diwesiyo jata coyeneyatha xua pocotsiwa jiwi ba exana. Poxonae ba nacueyatabe pebinbe peburúya nanta xeinabe xua nantiya penata exanaenexabe yawa daxota nawún dutabe paperatha, bara baponbe bewa exanaenabe po coyene baponbe tsiwúnae yabara muxu dutabe. Ichun jopa itacupaetsi xua ichawa equeicha mataropata tina icha bayatha nawún tinabe. <sup>16</sup>Nacom exana pia petsiwúnae yabara muxu dutsiwa Abrahamtha yawa iru Abraham pia pemomoxi susato jiwi jiwapanintha tatsi. Nacom Pejume Diwesitha jopa jeyo: “Pia pemomoxi susato jiwitha”, jopa jeyo. Jame meisa caeintha yabara jei: “Pia pemomoxi susato jiwi jiwapanintha”, jei. Baxua yabara paeba xua Cristo yabara caunutatsi. <sup>17</sup>Baxua paca tsipaebatsi meje: Poxonae Nacom yabara tsiwúnae muxu duta Abrahamtha, bapoxonae poxonae cuatrocientos po weibe yapucaewa bapoxonae Moisés pia peitorobi coyenewa tatsi patopa. Moisés pia peitorobi coyenewa tatsi jopa ainya cuiyiyo beyacaincha Nacom pia peyabara tsiwúnae muxu dutsiwa tatsi xua daxota jiwi jopa

nantawenonaeyo barapo Nacom pia peyabara tsiwunaeyo muxu dutsiwa tatsi. <sup>18</sup>Ichá jiwí itacupatsi xua panenebiya abe pia peexanaeyo cuiru coyene weya xua peexanaexae pocotsiwa Moisés pia peitorobi coyenewatha itoroba, bapoxonae ainya cui aibi po peyabara tsiwunaeyo muxu dutsiwa Nacom yabara tsiwunaeyo muxu duta Abrahamtha. Ichitha poxoru jiwí jopa itacupaetsi xua pepanenebiwa abe pia peexanaeyo cuiru coyene weya poxonae bequein exanaetha pocotsiwa Moisés pia peitorobi coyenewatha itoroba, daxota bichocono ainya cui po peyabara tsiwunaeyo muxu dutsiwa, Nacom amanayiya yabara tsiwunaeyo muxu duta Abrahamtha.

<sup>19</sup>¿Eta xua metha canamatawenonatsi Moisés pia peitorobi coyenewa? Nacom naca cata baxua abe waexanaexae beya poxonae Cristo patopa, pon Abraham pia pemomoxi susato jiwí jiwanaopin tatsi pon yabara tsiwunaeyo muxu duta Nacom. Nacom cata pia peitorobi coyenewa matatsunpiwítha xua barapomonaeyo xuya Moisés catatsi jiwí nexa. <sup>20</sup>Ichitha poxonae Nacom yabara tsiwunaeyo muxu duta Abrahamtha, bapoxonae dapon aibi pon capona barapo peyabara tsiwunaeyo muxu dutsiwa Abrahamtha Nacom weya. Jame saya meisa Nacom compa yabara tsiwunaeyo muxu duta Abrahamtha.

### **Meje yabara xua daxota Nacom itoroba Moisés pia peitorobi coyenewa tatsi**

<sup>21</sup>Paca yainyabatsi: ¿Moisés pia peitorobi coyenewa abe cana exana Nacom pia peyabara tsiwunaeyo muxu dutsiwa tatsi? Jume, apara tsipei Nacom jopa capanenebiyae tsane jiwí peexanaexae Moisés pia peitorobi coyenewa tatsi. Ichá jiwí itacupaetsipatsi xua capanenebiyatsi abe pia peexanaeyo coyenein weya peexanaexae po coyene Moisés pia peitorobi coyenewatha itoroba, bapoxonae jiwí juntu coyene xanepanaetsipa Nacomtha peexanaexae po coyene Moisés pia peitorobi coyenewatha itoroba. <sup>22</sup>Nacom Pejume Diwesitha jeye: “Daxita jiwí bewa atene tsane abe peexanaeyo coyenein peexanaponaexae xua jopa itacupaetsi xua penacui barapentsiwa. Daxota daxita pomonaeyo Jesucristo pejume cowuntsiwíchi Nacom cana exanaena jiwí po coyene xua bayatha yabara tsiwunaeyo muxu duta xua bepa pinaeyo jiwí capanenebiya tsainchi Jesucristo pejume cowuntsixaetsi”, jei.

<sup>23</sup>Pewunaeyo xua poxonae Cristo pepatopeicaewa tsane po peitorobi coyenewa Nacom Moisés catatsi naca yaputane exana xua poxonae Cristo patopeicaena bapoxonae waxainchi bara bewa jume cowuntichi Cristo. Barapo peitorobi coyenewa yabara naca yaputane exanano xua po coyenewa waxainchi wacoutha nata exainchi. Jopa naca exanaeyo xua Nacom wanaca capanenebiwa. Daxota po diwesi Nacom Moisés catatsi barapo diwesi naca juntu coyene yawenapona beya poxonae Cristo patopaetsica. <sup>24</sup>Moisés pia peitorobi coyenewa naca yawena xua wayaputaewa Cristo. Barapo Moisés pia peitorobi coyenewa tatsi naca

yawena xua najuntũ coyene xanepana exainchi Nacomtha wajume cowuntsixae Cristo. <sup>25</sup>Anoxuae jume cowuntatsi Cristo, daxota jopa nantawenonaetsi Moisés pia peitorobi coyenewa tatsi. <sup>26</sup>Paxam painya nejume cowuntsixae Cristo Jesús, daxota daxita paxam Nacom pia pexui tatsi pam. <sup>27</sup>Daxita paxam poxona bayatha ichamonae paca bautisaba caemonae pana naexaname Cristo Jesustha, Cristo pijimonae tatsi pamxaem. Daxota paxam pacoyene jupame Cristo. <sup>28</sup>Nacom daxita jiwi tsita najupatsi. Daxota Nacom jopa tsita ainya cuichi metha bequein judiomonae pam tsipaem, irũ metha bara bequein griegomonae pam tsipaem pomonae jopa judiomonae naexanaeyo. Matautano jopa tsita ainya cuichi metha bequein pomonae amanaya painya nepaca busi cui tatayebeibiwi pam tsipaem, irũ bara bequein pomonae jopa amanaya painya netanacuichi jiwi pam tsipaem. Matautano jopa tsita ainya cuichi metha bequein bara pebiwi pam tsipaem, irũ metha bequein yabũxi pam tsipaem. Nacom tsitatsi xua paxam be caemonae jiwi pam xua caemonae pana nabarũ exaname Cristo Jesustha. <sup>29</sup>Icha paxam Cristo pijimonae pam, bara nexata paxam Abraham pia pemomoxi susato jiwi pam. Po coyene Nacom Abraham yabara tsiwũnae muxu dutatsi bara baxua paxam nexa.

**4** <sup>1</sup>Xua ichichipan xua tapaebiwa baxua meje: Icha pexuyo paxa cuenta tũpatsi poxona cataunxuae pexuyo tsecae barapoyo jopa bepijawa catichi ichamonae pocotsiwa xua coxiyũn pecopaniwa tatsi tsipei cataunxuae pexuyo tsecae. Barapo pexuyo bewa exaneibina pocotsiwa peitorobeibixaetsi pomonae wichiya pebarũ jinompaewichi icha ichi xua poxona exana pomonae amanaya petanacuichiwi ichamonae nexa. <sup>2</sup>Barapo pexuyo nantauta pomonae peyawenaewichi, pomonae bapon wichiya pebarũ jinompaewichi. Matautano pexuyo itorobatsi pocotsiwa barapo pexuyo bewa exanaena. Barapomonae ewata xua barapo pexuyo catsinchi poxonae pinyo tsane be po coyeneya bayatha coxiyũn paeba. <sup>3</sup>Waxainchi bara pocotsi jũta coyeneya ichichi beya poxonae Cristo patopeica. Waxainchi be pexui natsicotainchi tsipei pemayainwa exanatsi pocotsiwa Moisés pia peitorobi coyenewatha naca itoroba. <sup>4</sup>Poxonae barapo matabi patopa, po mataqueitha xua Nacom ichichipa xua Pexanto itorobica, bapoxonae barapo mataqueitha Nacom Pexanto itorobica xua yabũyo petsiperũ wenaexanaenexatsi barapo cae pin nacuathe. Bapon yacuiya naexana judiomonaepin. Matautano bewa exanae pocotsiwa judiomonae ba itoroba xua pocotsiwa pepaebixae Moisés pia peitorobi coyenewa tatsi. <sup>5</sup>Bapon patopa xua jopa wanantawenonaenexa xua waexanaewa tsane pocotsiwa Moisés pia peitorobi coyenewatha naca itoroba, xua bapoxonae Nacom wanaca cana exanaewa tsane xua Nacom pia pexuichi. <sup>6</sup>Nacom pia pexui tatsi painya nenaexanaexae, daxota pacata itorobica pia Pejumo pe tũnaxũ tatsi pia

painya nepaca cayawenaewa tsane poxonae paca jüntü coyene tsipaeba. Barapo Nacom pia Pejumope tunaxü tatsi naca cana exana xua wajeiwa: “Axa”, xua wajeiwa Nacomtha. <sup>7</sup>Anoxuae paxam jopa barapocotsimonae pam pocotsimonae xua amanaya tanacuita caurimonae pia pentacaponaein tatsi nexa icha be pocotsimonae ichi xua pocotsimonae pebusi cui tatayebeibiwichi. Nacom paca exana pia pexui tatsi. Tsipei paxam Nacom pia pexui tatsi pam, daxota Nacom paca catsibina daxita po coyenein Nacom xeina pia pexui tatsi nexa.

**Meje yabara poxonae Pablo yabara nanta xeineiba  
pomonaе pejume cowüntsiwi Jesucristo**

<sup>8</sup>Pewünaeya xua poxonae payaputaename Nacom, copiya paxam be barapocotsimonae pam be pocotsimonae bewa exanae xua pia nacomün itorobeibatsi, po nacomün xua saya jiwi pia coya cana exana xua jopa pepa nacomünyo. <sup>9</sup>Ichitha anoxuae Nacom payaputaneme, yawa paca tsipaebatsi xua Nacom paca yaputane. Jopa bewa equeicha caewa pana naexanaem xua paexaname pocotsiwa Moisés pia peitorobi coyenewatha paca itoroba xua pocotsiwa caena bayatha copiya paexaname poxonae cataunxuae jopa pajume cowüntsim Nacom. Barapo Moisés pia peitorobi coyenewa jopa paca yawenaeyo xua painya nepatsiwa Nacom beya. Bewa paexanaename po coyene barapo peitorobi coyene itoroba. Poxonae saya ü painya neexaneibi barapo coyene barapoxonae be barapocotsimonae pam be pocotsimonae xua bewa amanaya exaneibina pocotsiwa itorobeibatsi pia pecanamataxeinaeinchi tatsi. <sup>10</sup>Paxam awiya cataunxuae paxeiname pocotsi coyenewan xua judiomonaе itorobatsi Moisés pia peitorobi coyenewatha. Barapo coyenewa itoroba xua matabin yabara yawa xua xometon yabara yawa xua wei yabara, po coyene jiwi bewa exanaena penajainbotsi yabara, yawa xua pin penabanaewa peexanaewa matabin yabara. Barapocotsi coyenein paexaname painya nenanta xeinaexae xua painya nenajüntü coyene xanepana exanaenexa Nacomtha. <sup>11</sup>Tsipei cataunxuae baxua paexaname, daxota jüntü coyene wecoyan, poxoru pocotsiwa xua paca cuidubatsi jopa paca yawenaeyo, tsipei paexanaponame pocotsiwa xua caena bayatha paexanaponame xua abe paexanaponame.

<sup>12</sup>Tamonae pam, pomonaе irü painya nejume cowüntsiwixae Cristo. Paca itorobatsi xua painya coutha pana naexande xua jopa paexanaeinde pocotsiwa Moisés pia peitorobi coyenewatha paca itoroba, icha xan ichin xua tacoutha naexanan xua jopa exanaeinyo pocotsiwa Moisés pia peitorobi coyenewatha itoroba. Bara bequein xan judiomonaepin, ichitha Nacom necapanepa xua jopa tanantawenonaewa tsane xua jopa taexanaewa tsane pocotsiwa Moisés pia peitorobi coyenewatha itoroba, icha paxam paichim xua jopa panantawenonaem xua jopa paexanaem

pocotsiwa Moisés pia peitorobi coyenewatha itoroba. Paxam pomonae jopa judiomonae panaexanaem. Bayatha paxam jopa painta abe exanaem, daxota nanta xeinan xua bara pana nejume taneme pocotsiwa paca itorobatsi. <sup>13</sup>Payaputaneme poxonae copiya paca tsipaebatsi Nacom pia pecapanenebiyae diwesi, tsipei atenein daxota jopa warapaeinyo. <sup>14</sup>Bequein pacata ayapube xua poxonae pana netaneme xua atenein, ichitha jopa pana necui capanaeya itawetsim. Seicaya paexaname, bara beta pana nententa weyataeya wabame icha be poxonae matatsunpintha paichipaem poxonae patopa po matatsunpin Nacom pia matatsunpin tatsi, pon peainya cuin, yawano xua icha be poxonae pacana ichipaem Jesucristo poxonae patopaetsipa. <sup>15</sup>Copiya bayatha bichocono pajuntũ coyene weiweiname, anoxuae jopa paraichim. Bequein baxua paexaname daichitha awiya wũnae paca yabara paebatsi ichamonaetha xua paxam bichocono pana neantobem. Matautano bichocono jopa juniya pana neantobem pata tana neyawenaexaem tsane xua beya poxonaeno pana naitacuere jucame xua pata tana neantobexaem. <sup>16</sup>Anoxuae pana neexaname be pata tana neaitafaetabi jiwim, tsipei yabara paca tsipaebatsi pexainyei jume diwesi.

<sup>17</sup>Po judiomonae jiwi pecuidubiwi barapomonae naemata wũnaeya paca tsipaeba, ichitha peajuntũcoyenebe jiwi. Daxota barapomonae baxua pacata exana pia painya tana nepenticham pia bapoxonae xuya painya ichichipaetsi barapomonae. <sup>18</sup>Baraxua bara bequein wũnae xua ichamonae paca ichichipa, daichitha saya jame poxonae juntũ coyene wũnae. Barapomonae bewa daxita matabi paca yaweneibina jopa meisa metha poxoru ecaeinchipae. Matautano bara bewa paca yawenaena poxonae jopa ecaeinyo. <sup>19</sup>Tamonae pam, paxam be pomonae tapexui pam. Paxam nexa bichocono ajuntũcoyenerewein xua anthũthũtanein, icha be poxonae yabũyo ichi poxonae bichocono atene poxonae beya pexuyo pabeta. Baraxua cataunxuae exanaponaein beya poxonae pajuntũ coyene wũnaem tsane icha Cristo ichi xua juntũ coyene wũnae. <sup>20</sup>iMaise ichichipan bichocono xua tapaca barũ ecaewatsi anoxuae xua tapaca tsipaebinxatsi icha jumetha, xua jume wũnaeya tapaca tsipaebinxatsi! Tajũ taecaexae xan jopa yaputaeyo xua eta bichin xua tapaca yabara nanta xeinaewatsi xua tapaca yawenaenexatsi.

### Meje yabara xua yabũyobe Agar iru Sara

<sup>21</sup>Paxam pomonae pam pomonae painya neichichipaewa xua painya neexanaewa pocotsiwa Moisés pia peitorobi coyenewatha itoroba. Pana nejume nore. ¿Paxam jopa pajume taem xua barapo peitorobi coyenewatha paeba? <sup>22</sup>Barapo peitorobi coyenewatha paeba jeye: Abraham xeina ainya pexantobe. Abraham icha pexanto exana powatha xua powa Abraham pia botha tanacuitatsi amanaya, powa pebusi cui

taetaexae. Icha pexanto exana powatha powa yatsicaya Abraham piowa tatsi powa xua jopa amanaya petanacuichiwatsi. <sup>23</sup>Powa Abraham tanacuitatsi amanaya, bapowa pexanto tanaexanatsi bara jupa icha be ichi xua poxonae ichamonae tanaexanatsi pexui. Powa Abraham pepa piowa tatsi, powa xua jopa pexui cui taetaewatsi, Nacom cana exana xua bapowa pexanto tanaexanatsi tsipei bayatha Nacom Abraham yabara tsiwuna nae muxu dutatsi. <sup>24</sup>Baraxua be pacata exanatsi xua peyabara caunutsiwa. Barapo ainya petsiriwabe baraxua yabara caunuta xua Nacom pia ainya petsiwa nae muxu dutsiwa tatsi. Agar pexanto tatsi bapon pia pemomoxi susato jiji tatsi bewa exanae xua Moisés itoroba pia peitorobi coyenewatha tatsi. Barapo peitorobi coyenewa Nacom Moisés catatsi ichaxota demxuwa, po demxuwa pewun Sinaí. Barapon, Agar pexanto tatsi yacuiya naexana xua pon pexui cui taetaeinchi. Barichi barapon pia pemomoxi susato jiji tatsi barapo coyeneya yacuiya naexanumenapona. Daxota barapomonae bewa exanapona po peitorobi coyene Moisés itoroba. <sup>25</sup>Barapowa Agar caunuta po demxuwa pewun Sinaí xua Arabia nacuaatha, po demxuwa Arabia nacua monae pijumetha: “Agar”, jei. Barapowa Agar xaniwaicha yabara caunutatsi anoxuae po tomara Jerusalén tomara, poxoru barapo tomarapiwi nanta xeina xua bewa exanaena Moisés pia peitorobi coyenewa tatsi icha Agar ichi xua bewa exanae pocotsiwa Abraham itoroba xua powa pexui cui taetaewatsi pecana exanae xatsi. <sup>26</sup>Icha Jerusalén tomara, po tomara seicaya Nacom pia nacua theicha eca xua Nacom pia tomara, barapo tomara yabara caunuta pocotsiwa xua bichocono xanepana. Barapo Jerusalén tomarapiwi jopa bewa exanae tsane Moisés pia peitorobi coyenewa tatsi. Waxainchi apara barapo tomarapiwichi. <sup>27</sup>Nacom Pejume Diwesitha Sara tsipaebatsi, jeichichi:

“Petsiriwa powa mawecowam, xam powa jopa xeinaem pexui, juntu coyene weiweinare. Juntu coyene weiweinaya najume tsebare, tsipei xam jopa xeinaem pocotsiwa peatenewa. Po petsiriwa jopa pexui xeinaeyo, barapo petsiriwa bichocono ayei jiji xeinaena pexui beyacaincha po petsiriwa piseuri baru popona”, jei Nacom Pejume Diwesitha.

<sup>28</sup>Tamonae pam, paxam pomonae iru painya nejume cowuntsiwixae Jesucristo. Waxainchi Nacom naca cana exana icha Isaac ichichi pon Abraham pexanto tatsi, pon bayatha Nacom Abraham yabara tsiwuna nae muxu dutatsi. Waxainchi barapo pexuichi, po pexui Nacom yabara tsiwuna nae muxu duta wajume cowuntsixae. <sup>29</sup>Po pexanto Agar tanaexanatsi xua pon naexana bara jupa icha be ichi xua poxonae ichamonae pexui tanaexanatsi be pon pewun Ismael. Bapon Isaac

taayapube exainchi, pon naexana poxoru Nacom pia Pejumope tñaxu tatsi peitorobixae. Bara jutiya ichi anoxuae pomonae xua Nacom pia Pejumope tñaxu tatsi pexeinaewi taayapube exainchi xua ichamonae exana, pomonae peexanaponaewi po coyene Moisés pia peitorobi coyenewatha itoroba. <sup>30</sup>Ichitha pajume taema xua Nacom Pejume Diwesitha paeba, jeye: “Powa amanaya jinya necatanacuichiwa powa nebusi cui taetaexae jinya botha itawere yawa muxuna itawere pia pexanto tatsi. Tsipei barapo pexanto tatsi jopa itacupaetsi xua pexeinaewa pocotsiwa coxiyun pecopaniwa tatsi xua saya cuita pepa pexanto tatsi nexa powa jopa pebusi cui taetaewatsi amanaya”, jei Nacom Pejume Diwesitha. <sup>31</sup>Tamonae pam, paxam pomonae iru painya nejume cowuntsiwixae Jesucristo. Jopa dapomonaetsi icha be ichi po pexui powa pebusi cui taetaewatsi amanaya pia pexui tatsi pomonae bewa exanaena pocotsiwa Moisés itoroba. Waxainchi jame barapomonaetsi icha be ichi po pexui powa jopa pebusi cui taetaewatsi amanaya pia pexuichi. Daxota waxainchi jopa nanta wenonaetsi xua waexanaewa po coyene Moisés itoroba.

**Meje xua Pablo yabara paeba xua jopa bewa equeicha  
exanae Moisés pia peitorobi coyenewa**

**5** <sup>1</sup>Cristo naca yawena xua equeicha jopa wanantawenonaewa tsane xua waexanaewa pocotsi coyenewan Moisés pia peitorobi coyenewatha itoroba xua Nacom jopa watsita xeinaewa tsane xua watsita natsicuentisiwa xua abe waexanaexae. Beta ajantuyapusya pajume cowuntaponde Nacom, xua bapoxonae jopa painya necopatsiwa tsane xua ichamonae paca itorobina xua painya neexanaewa pocotsiwa Moisés itoroba.

<sup>2</sup>Xan, Pablon, pana nejume taema. Jopa equeicha pacopatsinde xua bara judiomonae paca wi thabina, pomonae pebiwi pam, ichaxota panareixacaename. Tsipei icha baxua paexanaetsipame bapoxonae Cristo jopa paca yawenaetsipae po coyene bapon nepaca juntu coyene xanepana exanaewa tsane Nacomtha. <sup>3</sup>Equeicha ichichipan xua tapaca tsipaebiwatsi. Po pebin xua wi thabatsi xua judiomonae exana, barapo pebin bara be judiomonaepin naexana. Bapoxonae bapon bewa daxita matapaeicha coyenein exanaena pocotsiwa Moisés pia peitorobi coyenewatha itoroba. <sup>4</sup>Paxam pomonae pananta xeiame xua paca juntu coyene xanepana exanaena Nacomtha painya neexanaexae pocotsiwa Moisés pia peitorobi coyenewatha itoroba, apara paxam Cristo papentame. Yawa panaitematame Nacom pia peantobewa tatsi. <sup>5</sup>Nama jume cowuntsiya ewatatsi xua Nacom naca juntu coyene xanepana exanaena xua jopa watsita xeinaewa tsane wanatsicuentisiwa xua abe waexanaexae. Nacom pia Pejumope tñaxu tatsi baxua nacata exana

wajume cowuntsixae Nacom. <sup>6</sup>Waxainchi caemonae peburuya Cristo Jesús piamonae wanaexanaexaetsi jopa naca yawenaeyo icha ichamonae naca wi thaba xua judiomonae wanaexanaewa tsane. Ichacuitha icha jopa naca wi thabiyo baxua iruru jopa naca yawenaeyo. Jame pocotsiwa xua wanaca yawenaewa bewa jame jume cowuntichi Cristo Jesús. Barapo pejume cowuntsiwa naca exana xua antobeya wajinompaewa.

<sup>7</sup>Bayatha copiya beta pajinompame painya nejume cowuntsiwatha. ¿Jintam metha pacata ayapube exana xua daxota jopa painya neexanaewa pocotsiwa Nacom pia pejume xainyeiwatha paeba? <sup>8</sup>Apara Nacom jopa pacata exanaeyo baxua xua pacata ayapube exana pon paca waba. <sup>9</sup>Payabara nanta xeinare po diwesiyo xua jeye: “Levadura ba peyauyo xoyo atsaxa tsecae daxita carepaya matapaeicha atsaxa exana pantha”, jei. Barapo coyene icha be ichi poxonae abe peexanae coyene po coyene bewayo painya xainya bejojopa tsiniya. <sup>10</sup>Jume cowuntan Nacomtha pon jiwi Pecanamataxeinaein xua jopa painya neitapetsiwa tsane icha painya barompaya nenanta xeinaewa xua icha be jopa ichiyo pocotsiwa nanta xeinan. Icha ichun paca juntu coyene tsacaba xua paca itoroba xua abe painya neexanaewa tsane Nacom atene exanaena bapontha. Jopa Nacom tsita ainya cuiyotsi metha bequein pon jopa peainya cuiyo, matautano metha bequein pon peainya cuin jiton, ichitha atwiya atene cana exanaena.

<sup>11</sup>Tamonae pam, paxam pomonae iru painya nejume cowuntsiwixae Jesucristo. Icha cueicueijan tsipae xua bewa jiwi wi thabichi metha judiomonae jopa inta abe exanaetsipae. Yawa bapoxonae barapo judiomonae jopa aichaxaibi tsipae Nacom Pejume Diwesi, po diwesi xua Cristo yabara paebatsi po coyene xua naetotha tupa. <sup>12</sup>Pomonae xua paca juntu coyene cui tsacaba xua paca itoroba xua paca wi thaba barapomonae pin jumetha yabara janje: “Jame maisa bu moya bara pia coutha natobu jucaena xua daxota jopa ichamonae peitorobiwa tsainchi xua penawi thabiwa tsane”, jan.

<sup>13</sup>Tamonae pam, paxam pomonae iru painya nejume cowuntsiwixae Jesucristo. Nacom paca itapeta xua jopa painya nenantawenonaenexa tsane xua jopa equeicha painya neexanaewa tsane pocotsiwa Moisés pia peitorobi coyenetha itoroba xua Nacom jopa painya netsita xeinaewa tsane painya tsita natsicuenta xua abe painya neexanaexae. Poxoru jopa painya nenantawenonaemxae xua painya exanaewa barapo Moisés pia peitorobi coyenewa tatsi painya nepaca capanenebiyaenexa tsane daxota jopa paexanaeinde pocotsiwa xua abe, pocotsiwa xua jiwi pia coutha ichichipa exana. Jame paexande pocotsi coyene xua ichamonae payawende xua nantiya caemonae painya nenaantobexae. <sup>14</sup>Paxam paexaname daxita pocotsiwa Moisés pia peitorobi coyenewatha itoroba poxonae paexaname barapo cae coyenewa xua jeye: “Antobeinde jinya

necatsicuarabũ enaewi, icha ichim xua naantobem jinya coutha”, jei.  
<sup>15</sup>Icha paxam bichocono nantiya atene pana naexaname, yawa icha bichocono nantiya daunwei pana nata exaname, dota pam pepu painya nenaaitafaetabi jiwi pam tsipae xua jopa beta painya nejume cowantsiwa Nacom.

**Meje xua Pablo yabara paeba pomonae yawa  
jinompa Nacom pia Pejumope tũnaxũ tatsi**

<sup>16</sup>Xua pocotsiwa paca tsipaebatsi meje baxue: Nacom pia Pejumope tũnaxũ tatsi payawa jinompare. Bapoxonae jopa paexanaem tsane xua abe paexaname pocotsiwa xua saya jiwi ichichipa pia coutha exana.  
<sup>17</sup>Po coyene xua wacoutha wajũntũ coyenetha najũntũ coyene xeinatsi xua abe waexanae coyenewa baraxua Nacom pia Pejumope tũnaxũ tatsi jopa ichichipaeyo. Po coyene Nacom pia Pejumope tũnaxũ tatsi naca itorobeiba xua pexeinya coyene waexaneibinexa baraxua, barapo abe wananta xeinaewa jopa ichipaeyo barapo coyene, po coyene Nacom pia Pejumope tũnaxũ tatsi naca itoroba. Bapoxonae wajũntũ coyene irũ Nacom pia Pejumope tũnaxũ tatsi pia pejũntũ coyene tatsi jopa pebũrũya jũpaeya nanta xeinaebe. Daxota bequein paichichipame xua painya neexanaewa xua pexeinya peexanaewan ichitha jopa paexaneibim po coyenein pexeinya coyenein. <sup>18</sup>Ichitha icha Nacom pia Pejumope tũnaxũ tatsi itorobiya paca mata cainompa bapoxonae jopa bewa pananta xeinaem xua Nacom paca capanenebiyaena abe painya neexanae coyenein weya painya neexanaexae po coyene Moisés paca itoroba pia peitorobi coyenewatha tatsi.

<sup>19</sup>Pocotsiwan jiwi ichichipa pia coutha exana xua abe meje baxue: Ichamonae nata siwa xeina xua bequein jopa piseuri jiwi. Ichamonae bichocono nanta xeineiba pocotsiwa bichocono xua abe, yawa xua pecui tsacatsacapaeyo coyenewa xua weiweina. <sup>20</sup>Ichamonae wũnae jainta ibo nacomũn. Barichi ichamonae maratha cataerubenanaebiya xua icha jiwi maratha cataerubenanaebiyatsi. Ichamonae caemonae nantiya naita aenae-aenei. Ichamonae nantiya naba. Ichamonae nantiya nauwa. Ichamonae nantiya nacaseba. Ichamonae asiwa piawan. Ichamonae natsatabe exana. Ichamonae pia matabũxũmonae nacana exana be pomonae seicaya barompaya penanta xeinaewi. <sup>21</sup>Ichamonae yabara uwa pocotsiwa xua ichamonae xeina. Ichamonae juteba xua icha jiwi pejutebiwatsi. Ichamonae cũpatsi. Ichamonae penajainjũbi jiwi bichocono. Ichamonae ichawan exana xua peabe coyenewan. Yabara paca tsiwũnae muxu dutatsi xua jũpa be po coyeneya bayatha paca tsipaebatsi, po jiwi bapocotsiwan exana barapomonae jopa patsi tsane Nacom pia peitorobi nacua beicha tatsi.

<sup>22-23</sup>Ichitha nama pocotsi coyenewan Nacom pia Pejumope tũnaxũ tatsi cana exanaena jiwi pejũntũ coyenetha tatsi baxuanje: Peantobewa

ichamonaetha, yawa pejüntü coyene weiweinaewa pejume cowuntsixae Nacom, yawa xua jüntema pejinompaewa, yawa xua jüntema pejinompaewa xua bepijawa jopa aitaconaeyo poxonae bequein ichamonae abe exana, yawa xua beta peexanaewa ichamonaetha, yawano xua peyawenaewa ichamonae pejüntü coyene xeicaewaxae, yawano xeina xua bichocono pejume cowuntsiwa Nacom, yawa bichocono pia coutha jopa penayabara nanta xeinaewa, xua saya yabara nanta xeina ichamonaetha, yawa po coyene xua penaitorobiwa pia coutha. Icha peitorobi coyenewa aibi po peitorobi coyenewa xua yabara paeba xua daxita barapo coyenewan pinae abe. <sup>24</sup>Waxainchi pomonaetsi xua Jesucristo piamonae tatsichi, jeichichi: “Poxonae Jesucristo naetotha cobe matatabarutatsi, wajüntü coyene, po jüntü coyene jopa wñnaeyo, nacata yawa muxuna tupa. Bapoxonae nacata aichurubenae exana po coyene xua abe waexanaewa”, jeichichi waxainchi. <sup>25</sup>Waxainchi jinompatsi wanaca yawenaexae Nacom pia Pejumope tñaxü tatsi. Daxota bewa bara copatichi xua Nacom pia Pejumope tñaxü tatsi bara naca matacarucua ducuaaebiyaena xua ichaxota daxita pocotsiwantha xua exaneibatsi. <sup>26</sup>Jopa bewa waxainchi ichamonaetha aebichi. Matautano jopa bewa nantiya naanaepana exanaetsi. Matautano jopa bewa nantiya nauwichi.

**Meje yabara poxonae Pablo jeye: “Nantiya pana nayawende”, jei**

**6** <sup>1</sup>Tamonae pam, paxam pomonae irü painya nejume cowuntsiwixae Jesucristo. Icha ichün pacui taneme xua abe exana, pon pejume cowuntsin Jesucristo, bapon payawende xua equeicha beta peponaewa tsane Nacomtha. Payawende bapon paxam jiwana pomonae pam Nacom pia Pejumope tñaxü tatsi pajume cowuntsiya jinompame. Jopa anaya bichocono pamuxuconaeinde xua abe peexanaexae. Ichitha dota pam, xua irürü paca jüntü coyene cana exana xua abe painya neexanaewa tsane. <sup>2</sup>Nantiya caemonae pana nayawende xua poxonae ichamonae ajüntücoyenerewe tsaibi pocotsiwa xua ajüntücoyenetane exanatsi. Poxonae nantiya caemonae pana nayawenae bapoxonae bara paexanaename pocotsiwa Cristo itoroba xua poxonae jeye: “Nantiya caemonae pana naantobeinde”, jei.

<sup>3</sup>Pon pia coutha nayabara nanta xeina xua jopa abe exanaeyo xua daxota jopa nantawenonaeyo xua peyawenaewatsi tsainchi, bapon pia coutha namuxuitoroba. <sup>4</sup>Jiton bewa pia coutha nacui yabara nanta xeinae xua exana, bapoxonae barapon jüntü coyene weiweina icha piawa beta exana. Bapon jopa bewa yabara nanta xeinae pocotsiwa xua ichün exana xua bichocono wñnae xua beyacaincha bapon exana. Daxita jiwi carepaya bewa barichi bewa pia coutha nacui yabara nanta xeinae icha metha bara wñnae xua pocotsiwan exana. <sup>5</sup>Daxita jiwi carepaya barompaya bewa exanaena pia penacuichiwan Nacom nexa be pocotsi coyeneya xua Nacom itoroba.

<sup>6</sup>Pon xua nacuiduba Nacom Pejume Diwesi, bapon bewa xuya catsina ichawa pocotsiwa xua penantawenonaewa pontha pon xua pecuidubinchixaetsi xua be pematomatsi coyenewa exana.

<sup>7</sup>Jopa painya coutha pana namuxuitorobinde. Dapon ajibi pon itacũpatsi xua Nacom muxuitorobatsi. Pocotsiwa xua pebin exana bara barapocotsi coyenetha cuita yabara cana exanatsi. Icha bapon abeya exana barichi bara abeya cuita yabara cana cui matomatatsi. Matautano icha bapon xanepanaya exana bara xanepanaya cuita yabara cana cui matomatatsi. <sup>8</sup>Icha ichũn exana pocotsiwa xua pia coutha ichichipa exana pocotsiwa xua jopa xanepanaeyo, bapoxonae bapon xuya cuita xeinaena pocotsiwa xua abe xua jiwi tũpa exanatsi. Ichitha icha bapon exana pocotsiwa xua Nacom pia Pejumope tũnaxũ tatsi ichichipa, bapoxonae barapo Nacom pia Pejumope tũnaxũ tatsi bapon catinchi peajũntũyapusũwa xua ataya tsiteca. <sup>9</sup>Jopa bewa ajũntũcoyenefaetabi tsainchi po coyenewa xua beta waexanaewa Nacom nexa. Icha jopa ajũntũcoyenefaetabiya jinompae tsainchi xua beta waexanaewa Nacom nexa, bapoxonae po mataqueitha Nacom daxita wetsina Nacom naca catsina pentoma pocotsiwa wũnae xua xanepanaya waexanaexae. <sup>10</sup>Daxota poxonae daxita coyeneintha naca itacũpa xua exanaeinchi pocotsiwa xanepana bara bewa exaneibinchi ichamonaetha pocotsiwan xanepana. Baraxua bewa exaneibinchi daxita jiwitha. Nacom tsitatsi xua bichocono ainya cui xua yawenatsi pomonae Jesucristo pejume cowũntsiwichi, beyacaincha poxonae yawenatsi pomonae jopa pejume cowũntsiwi.

### Meje yabara xua Pablo najume wetsiya paeba

<sup>11</sup>Pataema xua matapainya tacoutha tinan, daxota pin itaneton tsica. <sup>12</sup>Pomonae judiomonae xua paca itoroba xua painya nepaca wi thabiwa tsane, barapomonae saya baxua exana pia icha judiomonae wũnae yabara nanta xeinaetsi barapomonaetha. Yawa barapomonae pomonae xua paca itoroba pomonae judiomonaexae naerabiya nanta xeinaeya jeye: “Poxonae Cristo Pejume Diwesi cueicueijeichi pomonaetha pomonae jopa judiomonae naexanaeyo, bara muxuna itorobatsi xua barapomonae bara bewa pebiwi wi thabinchi ichaxota nareixacaena. Bapo coyenewa icha waxainchi exanatsi baxua wamonae pomonae judiomonae jũntũ coyene weiweinaena. Bapoxonae barapomonae jopa nacata abe exanae tsane, bequein tsipaebatsi pomonaetha, pomonae jopa judiomonae naexanaeyo xua Cristo naca tsitũpa naetotha”, jei xua naerabiya nanta xeina. <sup>13</sup>Bequein barapomonae paca itoroba xua paca wi thaba ichitha jopa exanaeyo pocotsiwa Moisés pia peitorobi coyenewa itoroba. Barapomonae ichichipa xua paca wi thaba ichamonaetha, pia barapomonae paca yabara paebichi ichamonaetha xua barapomonae

paca itoroba. Barapo judiomonae ichichipa xua icha judiomonae yabara nanta xeina xua pomonae paca itoroba bara beta exana pia paca cui itorobixae barapo penawi thabi coyenewa. <sup>14</sup>Ichitha xan aichaxaibin xua tacoutha atsaquiya nayabara paeban ichamonaetha. Saya meisa bichocono atsaquiya yabara paeban xua Jesucristo petupaewa naetotha pon Wanacacanamataxeinaein. Cristo naetotha netsitupa daxota pocotsi coyenein xua xeina po irathe jopa netsita ainya cuiyiyo, xua taxeinaenexa yawa xan jopa tsita ainya cuiyinyo barapo cae pin nacuathepiwitha. <sup>15</sup>Jopa naca yawenaeyo icha naca wi thaba. Barichino jopa naca yawenaeyo icha jopa naca wi thabiyo. Jame pocotsiwa ainya cui xua bewa Jesucristo tsita xeinaetsi pena juntu coyene. <sup>16</sup>Barabu Nacom paca cata juntea painya nejinompaewa. Matautano barabu Nacom nantanuweya paca yabara nanta xeinaena pia painya nepaca yawenaenexa. Barabu Nacom daxita paxamtha barapo coyenebe paca cana exanaena pomonae pam paexaname po coyenewa barapo peitorobi coyenewa paeba, po peitorobi coyenewa xua yabara paeba pena juntu coyenewa, yawano barabu Nacom paca cana exanaena daxita paxamtha pomonae pam xaniwaicha painya nejume cowuntsiwi pam Nacom.

<sup>17</sup>Anoxuae yawano xua bexa tsaneno jopa ichichipaeinyo xua ichun inta ayapube exanaena xua poxonaeyabara paeba xua po coyene pinae Nacom jopa neitorobiyo xua tacueicueijejiwa tsane bapon nexa. Tsita itapeinya xeinan xua Nacom xaniwaicha bara neitoroba tsipei ichamonaenewan duba taperutotha tajume cowuntsixae Jesús.

<sup>18</sup>Tamonae pam, paxam pomonae iru painya nejume cowuntsiwixae Jesucristo. Barabu bapon pon Wanacacanamataxeinaein, paca juntu coyene weiweina exanaena pia painya nepaca antobexae. Je bara ichi tsane.

Baja Pablo.